

臺龍女泉旁有白蟾穴稍南有平田岡金剛石幽勝
奇觀塔東里許有東巖舊名舍身崖深無底止陽明
嘗於絕壁題詩易今名又有邃谷巖巖有谿傍有石
墩有東藏源源東爲中峯衆峯環外而此峯居中上
睇日月下矚雲雨清泉迸石翠霧凝空中峯之上有
甘露泉味冽甘美有浮桃澗會仙峯其下有太還嶺
斧柯嶺舊傳二仙對弈故名其東有列仙峯齊雲嶺
嶺南香林峯金光洞望之若有金色照耀北曰煎茶
峯下有呈鳳嶺有縣水有飲猿潭澌澌水流遶北麓
有仙人峯舊爲李白書堂基今有甘泉書院東北里

許有鳧鴈峯有龍潭波流清澈色如蒼苔有綺霞峯
有合澗二水合流下瀉爲千尺泉有弄珠潭漚浮如
珠有赤壁峯下有集福橋西十里與中峯對峙有雲
外峯有思賢巖巖半舊爲滕司諫書堂有頭陀嶺肖
人首爲王祕書書堂嶺西有翠屏峯南有金沙泉其
中爲無相寺東五里有羅漢峯其下有雙峯舊有臥
雲菴下有清漪潭有處士巖清隱巖劉世疎嘗大書
三字勒石有十丈洞石室四圍松檜森秀前泓一溪
南有葛仙洞高二丈餘洞口如甕茫無畔岸有三游
洞洞深邃有三曲有上下華池雙峯下曰下華池泉

甘土肥產異茗有歸雲嶺有獨秀峯有野螺峯有幘
峯其下有觀音巖巖上有真人峯又東北十里折而
南爲廣勝寺有釣魚臺有雪潭流泉湧瀆狀類雪花
深不可測其下有瓔珞泉北有雲巖洞怪石凌空廣
邃如堂奇花茂卉爲九華絕勝傳有獵者逐鹿偶值
其所再往不可得有枕月峯月出從此峯而上又前
有煉丹泉其上有五老峯有師子行道峯自廣勝東
北十里有西洪嶺嶺側有虎跑泉東三里爲蓮花菴
前有清水潭上有蓮花峯峯頂有古松一本甚奇勝
有石碑峯有招賢峯舊傳唐有隱者讀書于此北有

翠蓋峯五色蒼翠東有安禪峯梁杯渡唐道濟二禪師居焉有積稻峯勢如露困北有寶陀巖下五里有幽谷爲廣福寺又五里有拾寶巖舊爲甘贄行者之宅今爲圓寂寺其東有果老石伏虎巖舊傳伏虎禪師居此巖下三里爲曹沖菴舊爲廣化寺又東上三里上有蓮花峯有無極峯下爲碧雲菴前有雲門峯上有碧雲峯峯之半有石室西有螺髻峯霧龜石翠羽池百尺潭仙人塘又東南三里爲淨信寺上有春陽臺沈機石並環瑰屈曲北有黃匏城南去五里有覆盆峯有雙谿上爲福海寺前有臥牛石西上五里

有七布泉又上有九子峯其下爲寺前有文殊峯拱辰峯諸峯森列如衆星拱北有石照其側有天井有垂雲澗鬪雞石如兩雞互啄有三斧石南上里許有特峯又南十里有石崖石翁石泉石池並崇崛清麗爲翠峯寺絕巘有滴翠峯煙嵐濛霧翠色如滴廬黃敬亭隱在望中有石碑峯下有透碧巖南下有菖蒲澗舊生蒲一寸九節右側有昇雲峯下有潭旱乾不竭雲興即雨有翠微峯少微峯舊爲費拾遺書堂少微之北有碧玉泉天香嶺舊傳唐詔起拾遺不就使臣懼其逸也焚香諭旨故名嶺側有風輪石有梅花

峯有美人峯孤峯韜藏宛如淑女素妝西南五里有
青峭灣諸峯秀拔面挹其勝有玉甌峯峯側有淨巾
石北有雙石巖峭石雙聳夾道石壁插天流泉傾下
嘗有異物出焉東有漱玉灘兩石峭聳一瀑前流如
戛玉聲又有東陽澗有琉璃灘有雙闕峯凌空削壁
險峻無極不可以上稍次有天柱峯如柱插天爲淨
居寺其側有展旗峯山形南去如旗幟然前有疊石
塔敬而不傾鳥集不穢北有普賢臺嶺外有龍游澗
下有嘉魚池池中有石臺舊傳竇子明李化文釣魚
于此下有流觴灘百丈潭又東南十里有雲峯絕頂

育天池峯菱芡菰蒲不種自生有鳳棲峯其下有碧
流巖舊傳趙知微嘗種桃其間以會羣仙有二神峯
一有如兄弟然下有黃石谿平田千畝水旱無患上
三里有石菴西南有天台寺磧下有鉢盂峯勝槩攸
目爲化城寺東界又南十里勢聯九華有同山唐李
化文墓有霞山翠嶺翹秀西南十里有白鶴山巖壑
杳冥舊有白鶴真人廟貴池界東南五里有南陽山
羣巒積翠羅列如仙又三里有小魚龍洞由深谷而
下有大魚龍洞洞凡七洞口有水編筏秉燭乃可入
內外有石肖師象鍾鼓仙侶蓮花棋局抵七洞有石

寶日光射入石穴流泉湧出石埭界

李得春江上望九華感事

人生有窮達胡爲戀脂膏我來江上水三秋浮一舸
自昔受儒服數此空遊遨長吁忽矯首鬱鬱彼九峯高
青峯峙天際似欲駕波濤

李羣登九華

白日深山臥靈巖大士家有泉皆玉液無地不金沙
伐鼓龍堂濕扳松仙路賒大江望不盡搖筆弄煙霞
高峯平限日絕巘橫排霄永歲雲煙護中天神鬼
石泉飛晝雨竹浪送江潮白也人千載風流不可抄

勉再登九華即景

重登九子山天仙橋下水潺潺依稀雲樹清猶
多少樓臺翠已殘時化城寺災夜靜笛聲吹梵語月明

松影護禪關此中便是真如境玉露泠泠點石闌
張佳胤過九華作

倚杖驚看紫氣重謫仙人號九華峯中天玉樹參差
出萬壑朱霞次第封地壓長江標砥障雲開並蕪湧
芙蓉平生自負蓮花掌過此休談五嶽蹤

汪道昆望九華

九華秋色大江濱片片芙蓉照水新望裏蔚藍疑見

佛行邊空翠欲沾人汗衣赤日耽長路立馬青山負
近鄰百里未能窮窈窕千年誰與鬪嶙峋

王世貞余嘗夢登九華茲過陽山磯可以望見而
病熱竟過志感

九華九子秀十年夢寐間那知一夢覺頓失九華山
○ 吳國倫舟中望九華

秋浦城頭九子山峯紋片片落江關斗邊金削芙蓉
朶雲裏珠簪婺女鬟客棹遲迴看未足仙踪縹緲悵
難攀何當把釣清溪曲老傷煙霞醉不還

龔勉青陽道中

新羅成道處陟磴訪仙踪九子秀相競千峯翠並濃
蓮花雲靄靄天柱嶺重重老我多狂興還思駕玉龍

○ 張元忭登九華

九華南去路非遙料得山靈早見招朶朶青蓮磬積
雪重重丹萼吐層霄天因游客新開霽月到中大不
待邀聞道茗園泉更好便應澆渴借僧瓢

芙蓉削出與天齊雪後雲開路不迷江湧飛濤橫白
練磴懸絕壁立丹梯好泉偏釀僧家酒清梵晴撩午
夜雞九九峯頭無限樂何年卜築細攀躋

○ 駱駘曾遊九華

芙蓉片片晚峯頭秀色含空況早秋地盡大江青未
了天圍列岫翠長流人生幾日名山靜佛骨千年野
寺幽百里山前秋浦月間雲遙接郡城樓

沈懋學遊九華

生平夢不借偏與薜蘿親秋色遙侵客山光近媚人
莫教青眼舊更說白頭新明月珠林得期天問梵輪

又

縈紆危磴入雲深世上紅塵迴不侵化佛禪關明雪
磧謫仙詩閣暗秋陰石田遠帶丹霞色靈塔高標玉
樹林一歎萬緣歸寂照千山明月伴孤吟

又

斷崖千尺削芙蓉一隊閒雲落晚鍾獨倚月明清嘯
發居然天半走羣龍

王岳錫遊九華

石磴凌霄上翠崖碧雲深處有僧家不緣太白留佳
句今古何人識九華

徐榜登九華

吾道憐知己羣英集九華山連千嶂碧路繞一溪斜
真鏡空明月塵緣散落霞幽亭成小憩興欲踏蓮花

張程登九華

金碧唐朝寺登臨愜素襟雲深藏佛骨月冷照禪心
峯矗天中柱泉流沙裏金焚魚猶未得慙對碧山吟

何思登五溪望九華

忻對仙山勝雲封路欲迷靈宮緣地藏峭壁與天齊
野景浮青闊他山入望低行春渾汗漫無句可標題

鍾惺望九華

霏微昏旦候初分霞染輕嵐半似醺絕境未遊申後
約名山乍識證前聞殘暉露洗巖頭月新樣風呈洞

口雲螺髻蛾眉

俱峯名

晴可數煙中九十九峯紋

遊九華值陰

到悔三冬晚緣纜二日陞客能饒遠目天未破愁顏

雲鎖將飛石煙縫欲斷山歲除花落遍羨爾惜春閒

九華山

望晴如望歲曾不見殘暉嵐久山容病煙濃岫影肥
弟兄峯遜避子母石因依好乘仙人燭

九華山未名

來尋

織女機

九華山石名

雪霽終幽壑泉喧亦上方山興窺鵲牖巖戶像蜂房
寒火千龕影風林一縷香似多僧舍柏夏臘未全忘

摩空

嶺名在東巖上

陰亦好那更說晴朝磴閣巖膚半泉通

海眼遙旅行峯偃僕人立樹樵僥也有天台路

九華絕頂

冬春阻石橋

湯顯祖九華

滴翠峯前天柱高雲門清蘸發仙璈不知海上金輪
月夜夜神光起白毫

蕭良譽遊九華值雨

萬壑千峯霧不開虛疑銀漢放槎回山靈何事多猜
忌浪說登高作賦才

重登九華

名山重為美人來

齊畫圖面面倚雲

快哉霧雨溶溶
江如繡疊嶂排空

作堆千載知音憐我輩謫仙何事不重回

吳應賓五溪望九華

萬仞青冥混紫霄卜居應得傍漁樵空中幻出仙人
掌天上潛通織女橋鷲嶺亂翻蒼玉碎龍宮深駐白
雲遙化城已自非塵劫夜月禪心共寂寥

別九華山

踏碎蓮花路不迷出門長嘯楚天低青山送客忘三
笑綠樹隨人過五溪洞裏煙霞晴自散雲邊鍾鼓鳥
空啼殷勤更上層臺望怪底羣峯似掌齊

余翹遊九華

歷盡丹梯寶地開層臺飛闥絕塵埃炎空霧鎖幽厓
雪晴晝泉喧下界雷縹緲諸天清梵語憑陵千古謫
仙才逃禪作賦非吾事直取芙蓉照酒杯

湯賓尹重至九華

曾向山堂作主人而今遊屐又重新山山著意來供
奉齊辦雲煙和米薪

擬將白石煮清泉夜夜雲峯落枕邊十六年來舊時
道熟雲熟雨飽周旋

老大堂頭皺面皮他年都是乳沙彌勤勤問訊瞪
認我亦腮毛倍可疑

萬瓦如鱗繡碧空僧寮客舍盛西東獨遺佛殿灰

時化城記取菩提一劫中

瓣瓣蓮峯似蒜頭一層山裹一溪流夜來踏得溪聲
壯疑在錢塘江頂遊

詩如太白遺仙蛻學到陽明結聖胎慙負無能班二
子讀書堂裏又重來

記取容齋下睡時千山月落老猿啼書魂今夜三更
後猶檢從前子曰題

秋後芙蓉老面光籠雲幕霧巧遮藏李夫人病經憔悴

不肯將身見武皇

其日陰雨

袁中道登九子山

多時餐黛色逼視益孤清切玉峯端過盤鴉髻上行
雪明雙水合雲展萬峯平重見山尤物移余選勝情

徐石麟望九華

勝拔千山儻名因太白傳連空來秀色接地倒蒼煙
嶺碧搖江練峯寒湧石蓮何時蕉夢醒日晏此高眠

徐時泰遊九華山

結契馳名勝攀登快大觀列屏青未了抽筍翠多端
天與蓮花秀人從鳥道看懸流翻日彩怪石聳星盤
一具袈裟地千秋膜拜壇神光常護塔紫氣欲飛丹

戶迴狙為伺糧休霞可餐偏於樵路險不必必葛安
虎洞陰風峭龍湫暑月寒雲低時戀頂松老故敲蟠
竹露香來細茗煙鳥帶殘自然無俗駕惟有羨空翰
供奉名逾重仙真蹟不刊按圖殊草草何日遍噴岬

沈明臣道出九華山

好山九朵鏡中生人在青蓮花裏行日出煙消江水
綠聞歌偏是竹枝聲

董其昌詠九華

嵐深山影寒樵響不知處綠樹早營啼千峯一家住
魏浣初訂遊九華

天下幾奇觀九華一尤物扁舟何日來問訊新羅佛
鄭三俊望華

高振禪關拂逆風輕煙幻出紫芙蓉香容冉冉人間
屢宛是雲間第十峯

彩筆仙人采石家等閒飛字照天涯華箋一幅誰求
句笑擲如椽卓九華

春煙乍染宮袍綠却喜龍門覽眺多若箇祕奇尋不
到梅溪可奈史遷何

靈指撐雲何處來青蓮九朶一時開筍中更有青蓮
咏玉管余我兩萃嵬

王一楨登九華

路轉山盤乍杳冥丹梯歷上露華馨雲迷螺髻巖前
碧天在芙蓉頂上青沙飯當年來佛子石牀隨處結
仙靈飛昇晏坐非吾事會效鵬飛更築亭

王思任游九華山記

予令姑孰歲謁監司於秋浦每吟老杜高山擁翠青
則願調青陽一尉至玩華亭每恨不夕得長此亭足
矣壬寅六月以課績往而兄大然師漏仲容實來乃
訂門人張仲濠王中履共訪九子山臂篆手鑣約從
修醴出青邑九華廟十五里至西洪嶺雲物作壘各

有敗意而大然力呼以爲即撻鐵勿阻俄而霽矣見
枕月一峯秀矯天左雲觀弼之自此但有蓮花層矗
煙鬟亂堆聚首而學者命爲九子餘不勝問也五里
至石龍口峭嶠漸迫怪體幻來十里至山西屯則垂
天之雲倒立陰陽失昏曉矣乃飯於橋菴過野梁下
有朱瑚石骨席平三十丈流泉一派如雪霞舒走急
置酒上流腹臥而味接之吾家伯安先生賦九華瀨
流觴而縈紆遺石盤於澗道者豈樂此邪去梁百步
望見懸瀑一通馬上人眉岸盡帶棲賢三峽數里至
湧泉亭此雲石中仙醪也數里至半霄亭囊螺髻蟠
糾今弁兜洵武如此行小仙橋兩澗孤絕至碧霄亭
而九十九峯次第招我葛袂過大仙橋僧童以簫管
互迎空山細響鳥梵鳴泉殊不惡至望江亭霧中拖
曳一練疇昔舟中所極目碧靄者我今噓其間乎入
玄覽亭而江晶山翠爭媚含規客有恹思矣左折而
下抵化城寺肅佛後簡一竹樓憑之似翕碧菡萏中
一鬚者仲容方與中履丁丁然闕局道仲濠以爲如
此好山不看而擔糞溷乃公爲大然曰此二人者亦
九子坏也乃飛竿轟劇而宿質明謁太白祠虎蹄新
過如瓜圻有胡僧以藤杖夜巡虎來輒伏禮地藏殿

隨喜其塔老僧具云至德初王從新羅國卓錫於此以堪輿理察之此山獨小圓直中立似萬萼護包者佛所藏亦八風不襲人子更須知矣白蟞之事似若荒唐然青泥可食於傳有之予幼遊盱江從姑有米脂二穴氣每臭人仙佛作戲不可以腐斷也但舍利妙光緣薄未覲差爲闕事乃東上神光嶺望金剛尖山若戴杵東巖是地藏苦行處數轉而得龍頭石一巖險挂伯安手書周經偈在焉巖下則爲舍身厓粟人膚股者也南折而入一禪室枯僧一人跌其中吹五釵松而已而所爲古仙鉢盂雲門天臺繡壁聚講內峯外峯皆以萬纛卷揚共衛金藏之樞也自此而往猿居熊府啼嗥幽暗無樵迹矣予膽如瓠足如蘿欲即窮之會直指有檄山靈又將修妬因各賦數詩

還大都九華之勝李供奉發明之矣山多作怪學人物獸鳥之形團結移換朝銳夕方遂令三百里之間神目駭笑然而身即其顛俱疣附焰騰詭譎易厭昔人所謂可望而不可登者也寒碧秋凝集衆美而得大意者庶幾五溪橋上乎是役也所悵悵未游者九子寺七布泉所未見者鉢囊花玉瓔珞所見者石斑魚南天竹所聞者虎嘯克丁當所食者竹蓴石芝

得攜歸示人者仙掌扇金地茶

鄒元標將遊九華遇雨

平生濟勝非無具況慕茲山境最嘉穿屐何妨泥沒
勝老僧指點盡煙霞

登九華山歌

扁舟昨日過匡廬沐浴焚香謁五老今朝乘興上青
陽九華蒼蒼色更好歷歷星辰皆可摘迢迢直上青
天道青蓮居士何太奇江上看山便題詩曾蟠珠璣
何磊落於今巖壑光陸離新建生平真好游西江重
來十八秋心印只今誰具領乾坤俯仰空悠悠空悠
悠淚雙流識得一真萬事休悟來只在剎那間山僧
含笑虎溪頭石火光陰轉瞬過文章道德莫蹉跎古
今不少奇游者幾人山色共嗟哦

黃道周告辭九華

似爾千芙蓉搖搖青玉巖唾手不可攀相思但日眩
花實釀蜂房今非吾所舍突鶻羅漢峯不得廬其下
家山九十頭與爾貌梁甫合結萬里枝並蒂坐罽鼓
當年看浮圖只在地藏殿今日地藏人盡作浮圖面
方孔昭雨中遊九華

翠屏題出古登封削破青天不計重急雨忽添千尺

水空波隔斷兩層峯遙通樹影雲中屋曲遞田聲笠
下農此骨好令飛瀑洗上來一口吐成龍

蘸得虛空碧不同筆尖斜插空崖東直須身在重霄
上始覺胞吞九子中左右仄輪垂地肺往來輕羽挂
天風偶然衲語忘歸路去去江隨鴈影空

太白詩令帝釋聞陰晴反復獻羅紋高峯客杖常穿
日別嶺僧窓早放雲絕頂毒龍隨鉢水下方啼鳥逐
花羣此中一片鴻濛畫千里江光不許分

小山藏樹樹藏菴偶起青煙便結嵐十丈洞深迷日
馭五釵松古傲霜驂也聞瘦虎歸黃面向自潛魚

綠潭一百六峯皆露地中年湖海早抽簪

傅淑訓登九華

大火西流八月秋九華嶽色翠凝眸孤成河朔逢素
紹幾學扁舟盡子猷珍重山靈容俗客殷勤地主有
賢侯青天捧出蓮花掌策杖頻看到上頭

綠水天河秀色濃堆藍疊翠湧芙蓉神光忽現鳳凰
嶺佛日高懸鳧鴈峯下界客來聽夕梵上方僧定隱
晨鍾此中佳趣須窮討欲倩仙人九節筇

峭壁巉巖立未安天風珊瑚響雲端開山地有黃金
藏宛蛻天留白玉棺乍斷仍連峯九子將升忽墮磴

千盤我來不作遊仙夢只乞青精飯一餐
大千三界渺何許九十九峯俱不同雲閉東山太白
室天開西域瞿曇宮北窺建業衆峯小南去潯陽九
派通縹緲羽人家萬里分明蓬海畫圖中

胡永順五溪望九華

五溪深去路如絃華萼雕鏤燦目前萬疊峯巒全露
石四時雲霧每連天爭言轉法多尊者誰識題名有
謫仙不到東巖觀不止山靈何以待來年

羅華袞遊九華

路入華山深復深公餘三月共招尋幽窮洞壑千巖
峭高上雲霄萬木森風拂芙蓉妝梵譯谷傳簫管雜
龍吟捫蘿昏黑行須到一臥僧房淨客心

擊馬扳輿石磴難亭迴一徑頂如盤華連晴色空中
出練瀉江光望裏看五老驚迎新客至諸峯深鎖晚
春寒憑欄一發蘇門嘯緩步看山露已漫

佛日初高宿霧收攝衣頂禮到層樓梵身金碧光堪
掬山面芙蓉翠欲流高士結廬天柱遠禪僧入定石
堂幽更傳衣履來天上便是西方鉢可留

楊德培次五溪望九華

層巒天外擁闌干入座霏微秀可餐檻篔峯花含霧

遠亭迎石筍挂雲殘疑通帝座重霄迴似望吳門正
練難却渡清泉猶駐馬依回山色目中看

江南巖壑夙知名況復行旌傍化城常幸解衣饒濟
勝偶緣束帶負深盟孫登長嘯憑誰寄謝眺新詩未
擬驚為致山靈期有待翠崖丹谷好相迎

劉城遊九華記

天啓二年壬戌秋仲月幾望自郡之青陽爲九華也
次五溪登望華臺誦王文成公四詩旁睨汪侍郎墓
展焉晡入西門宿妙音寺會邑令縉雲李君如桂有
世好驩然道故謂遊九華必出青陽邑南至龍口迴
視芙蓉修纖繡錯然後歸而從西洪嶺廣勝寺登化
城然後出六泉口渡五溪梁乃爲得之余領其說明
日別李抵龍口凡八九十里道甚險仄罕從此上下
九華者還宿南郭明日曉發自西洪嶺廣勝寺上山
宿於立菴明日禮地藏塔徧歷東西寮詰旦謁李太
白陽明祠有絕句遂訪甘泉祠憩化城寺詰旦上東
巖窺闌悚仄僧曰陽明先生來此時未有闌履前出
巖外者足三分諸從遊學士皆變色戰戰又曰焚香
之衆誓捨身於茲者歲數人多不及防或損肌膚卒
不得死亦有失足捐軀者因募十方磬石以干之乃

至今余亦賦絕句既讀陽明周經偈復覽周公汝璣黃公尊素諸題名極目遐瞻凡峯之有嘉名者以數十計可視而不可即猶之乎五溪望華臺也暮返立菴明日下定心石二聖廟迴視鷹石左右巖岫窈窕出東巖不遠至老田少憩至六泉口已亭午徘徊依戀不遽行至陽華樓迴視芙蓉猶之乎東巖所見也既暝還入通遠門踰三日李行季達來問遊興余以三事質之曰李太白久寓秋浦特表茲山是開元時也在地藏前甚久九華俎豆宜無先此者而乃雜處荒居僅與一片亭垣兩行翠柏饗此煙霞可勝歎乎

過此不晉恐尚為勢家之所奪遊事之當講求者一也宋人有言新羅王子金地藏非佛國地藏王也按之九華碑版亦然然地藏來此在唐至德以前其涅槃在貞元十載使非諸佛應化之身豈能生而地湧泉歿而山墮石鎖骨屈伸如故哉岐地藏而二之亦非通識遊事之當講求者二也陽明之學所在必留況東巖托迹又有異於尋常題咏者固不必效廬山白鹿洞奏置弟子員凡督學使者莅池宜奠一爵以志作人庶幾芹藻得以常存且初名陽明書院今僅稱曰祠豈萬曆初年詔革書院之故歟祠幸不廢然

不能必之千秋遊事之當講求者三也行季聞予說
而躓之曰興廢有司職也辨論學人職也請以告後
之遊者

九華雜詩

山中生事自清幽剗木通泉爨下收石筍四時供客
住悶茶一碗足人留放懷隔宿雲成海乘興牽情水
滿樓世出世間皆最勝道林買此更何求

閒從高處閱來人盡道薰修居士身姑孰客多喧鼓
吹新安氣至識金銀往還崖洞徒來速酬勸杯盤不
厭頻最是過江舒六國一聲佛號海天塵

天台高處不勝寒四望悲風獨立難我以輕衫當畫
解僧言嚴雪昨宵乾木皮覆屋冬能好竹葉編籬臥
亦安忽覩金光開樂土滇南一塔日中看

李白祠堂累改營何人遂附裔餘名蒼葭玉樹從相
倚濁水青蓮本自生爲客偶然逢賀監在天仍已是
長庚風高月照千峯夜總有橫空絕唱聲

九華最絕霧光寒忽爾彌漫海國看鍾磬希微天外
度樓臺滅沒水中殘亦知幽勝皆堪戀不似瑰奇此
足歎我每凭闌成卹駭乘風御氣欲生翰

○沈懋功泊清溪望九華

片帆乍轉江之滸地湧浮圖近秋浦蓉城突兀障江
南勢若騰驥龍躍舞拂艦煙雲無定形嗟峨列嶽從
今古安得金丹鑄此身結廬天畔長為主青蓮高士
不可蹤牛馬風塵已負儂千古人豪應笑我不堪回
首白雲封

○方儀鳳春遊九華

靈斧何年劈九子懸崖削玉石生齒中有飛錫靄曇
雲六月晴空細剪水我之懷矣謫仙人謫仙斗酒腕
驅神筆花疑化山頭萼九十九峯都是春春行仄徑
半迷苔飛瀑空中隱若雷雪花噴薄天河落萬壑層
陰晝不開莫道看山山未遍離奇透伏還千變石丈
朝乘太乙船煙鬢暮擁芙蓉面赤水方壺襟帶間峨
眉二酉誰獨擅千仞翩翩更振衣濟勝寧教推許掾
王公弼陪何環應直指登九華

暫陪仙從禮金光拾級層層到上方杯影滿空嵐影
翠薜衣都惹繡衣香雨方小歇雲仍急山似常聞水
却忙第一空頭通帝座欲凌八翼叩天閭

又登九華

四年爲政久三次陟名山杖策攜雲去芙蓉約我還
佛現新蓮座僧開舊石關但遊遊不盡絕勝幾曾攀

此來秋未盡更與淡情宜契闊水流處遲迴山暮時
丹霞若點染翠壁總參差不到九華上安知天外奇

何朝宗登九華

九子開屏嶂蓮花滿法臺流霞飛紫去壘巘送青來
僧定鳥親榻坪空鹿臥苔勝遊攜好友把酒漫徘徊
張燦垣登九華

古寺虛浮際仙山擁化城人天依地軸魚鳥趁僧羹
在動照能靜馮虛勢欲行我來驚野鷺谷口散光明
○沈雲從己巳元旦以誓師勦賊道經九華羽書勿
遽不及眺賞感賦

歲改春回嵐氣清六花初霽望華行峯連縞碧鋪銀
海路踏瓊瑤度化城玉映空中崖樹幻筍懸天外石
蓮明心馳逐寇單車急辜負椒杯對景傾

崔培元五溪亭望九華

萬疊山中水一灣孤亭高見九華山遙知截路遲迴
處只在通雲窈窕間近古有人逃歲月于今無術許
躋攀勞勞束帶驅官路不及雙鳧自往還

再遊九華

九子峯推天柱尊芙蓉堆裏佛爲邨尚疑石內藏人
世已見天邊轟鳥門芝草崖香高士餽煙雲鉢冷毒

龍蹲葛洪亦是凡間令一自飛昇洞井存

黃名世夜宿九華

嵯峨峯嶺拂天齊寶殿煙籠五色迷僧住上方雲作
慢人于下界石爲梯時聞清唳丹霄鶴境比飛昇白
晝難自笑塵蹤間一宿蓮花仍在數峯西

曹學佺遊九華記

江上望九子如出水青蓮在龍背反視則盆中花也
過其下如長城列戟凜然生寒如鳥旂之狀隨風而
靡陟其巔則銳者爲筍凹者爲門有作貔虎有作佛
像奇詭百出而皆無所因依江水若浮之也九華之

數十重每入一重則溪水絡焉五谿之水出而
於一橋橋上與九華相對然正面非華也華乃
俯而側出其色與他山別如金屏綺障之中有豔
如粉如頰妝馬儻在朝霞夜月當如何作姿態耳從
此入山經一橋則一嶺而一谿也今人所遊止化城
耳寺去平地十餘里而近之巔尚一日程也化城閔
氏故居僧金地藏卓錫於此後捨宅爲寺文且說有
不僧地藏而佛地藏以來四方進香之人而僧爲徂
僧佛壤爲市翠微犁爲田澗水蓄爲溝矣客遊至此
興味索然遂有九華可望不可登之說夫客不登東

巖乎東巖平頂而虛腹猶有山意但視華巖則在雲表也東巖而下是閔園此一片地尚稱故物隔於谿則上華山既上山又不知其隔幾谿也嶺直削無磴躡小石而上遇大石則緣遇谿則斷而稍下然下不能敵上三之一谿盡而嶺始有橫者嶺盡則江始橫矣嶺多古松生石隙或偻或舞江上視之如花鬚也巖上以天台峯為最高其下有寺更越嶺數里始到僧皆苦行境色清絕夜中始聞鍾磬梵音真離一切垢濁而入寂樂國矣次日徑雲峯臺出龍背之青嶺縣又次日始達江上江上復望九華也山人曰去

華有太白祠云祠在化城寺地亦差高余意宜在工或之東巖亦足以面華矣華豈非以太白顯或於報德何取焉

說到九華山

奇峯招海客遠水到禪關夕照偏依樹秋雲盡離山芙蓉深作障彩翠疊成巖夢入天河裏金雞逐曉還巖御風九華

白雲無時無山面不全有借問住山人曾見山身否程世昌江上曉望九華

夢寐九華山十年懷眷戀時從江上行曉見惜顏面

吳鍾九華篇

遊人到九華便云登其首不讀古人詩安知遊者陋
簇簇青蓮花壁落蒼巖瘦以之名茲山諸山相領袖
今之謂九華雜沓無昏晝指此訂奇峯遊人自參徧
歷歷諸奇勝悉在山左右高志絕躋攀遠者難漸進
離合山之情羣峯自層覆戶以能迴環兼之有其秀
以茲擅靈異未經遊人走君非住山人偏有此尋究
乃知古今人因仙為新舊當口李青蓮與君聲並茂
遂使九華山名同五如壽於今已千年誰者步其後
冒起宗望九華

昨夜南風送客舫朝來池口雨溟溟忽看天際飛濤
白失却蓮花九朶青

李達登九華

峯迴如列戟山半帶飛泉鳥伺巖間竹僧耕石上田
草香分藥氣松露裊晴煙遙望青尖裏無人却住山
丁煜遊九華

高尋挾萬古冥坐生九華及戶連雲靜兼天入照澗
巖嵐朝際秀山雨夜來佳慮淨杳無著階前梅欲花
山氣此蕭森輪蹄未可尋淡然生坐照軒舉自披襟
客謂探奇倦僧疑閉戶深千峯瀉秋碧識此靜居心

丁燿登九華

高柱剡天白日停九峯環合晝冥冥龍來法案鍾俱
寂虎嘯空巖殿不高盡日風雷松壑徙經年霜雪石
花青使君公暇多遊覽千古風流草木馨

方學聖九華

多年夢想九華遊極目今纔到上頭曙早山高常少
夜雲深春盡似新秋道從僻洞幽人訪字向殘碑遠
代搜指點丹砂何易煉古來天地一浮漚

吳兆別九華山

寺前秋淨萬峯間正好尋山又別山谷轉溪迴留一

在才聲相送到人間

嶺重巖出路賒漸看龍口有人家行行數里猶向

首秋雪滿山蕎麥花

本朝梁清標望九華

秋浦樓東落彩霞輕輕鷗點點倚晴沙蓮開幢影羣峯
出珠像光中望九華

方文江上望九華

雪後江南見九子九峯皆作玉芙蓉何年始踐山僧
約掃葉烹茶過一冬

施閨章遊九華記

昔劉夢得嘗愛終南太華女几荆山以爲此外無奇
秀及見九華始自悔其失言是說也嘗竊疑之而李
太白以山有蓮花峯改九子爲九華予舟過江上望
數峯空翠可數約略如八九仙人云其山外峻中夷
由青陽西南行則峯攢岫複環奇百出而入其中則
曠以隱由山麓褰裳則寒泉數十百道噴激沙石碎
玉哀絃而入其中則奧以靜蓋巖壑盤旋白雲蒼鬱
道士之所族處者是爲化城一峯屹然四山雲合若
羣龍之攫明珠者是爲金地藏塔循簷送目虛白之
氣遠接江海而四方數千里來禮塔者踵接角崩叫
號動山谷若疾痛之呼父母蹈湯火之求救樞道士
爲市幾以山爲壟斷矣寧復知有雲壑乎於是
其可遊者曰東巖其上有堆雲洞師子石僧屋數
間刻王文成手書文成聚徒講學遊憩於斯有東巖
燕坐詩今求其講堂無復知者天柱峯最高俯視化
城爲一盂絕壁矗立亂山無數所謂九十九峯迷離
莫辨如海潮涌起作層波巨浪青則結綠紫則珊瑚
夕陽倒蒸意眩目奪蓋至此而九華之勝乃具惜非
間人不得坐臥十日招太白夢得輩於雲霧間相共
語耳遊以甲午歲十月從之者查子素先徐子道林

九華山中寄池州顏太守敏

人因訪舊來秋浦天遣尋幽入九華迴合松杉清磬
遠峻增宮闕白雲斜吞江西嶺橫飛練射日東巖倒
作霞遙憶使君驕五馬何時乘興問山家

李盤望九華

停車臨夕照長嘯見空濛拔地容偏秀撩雲勢更崇
峯文穿草徑塔影護花宮何日窮高勝青鞵挹遠風

王澤弘入九華

過客維舟覓路行出門無數遠山迎雲當薄暮垂
雨日到寒流照更明此去躋攀非攬勝誰同竹石
忘情春暉寸草何由報一叩慈容漾淚盈

陳焯江上望九華

未慙登臨興長餘望後思蓮開西嶽掌翠擁雪山看
瞰浪收三楚躔星配九疑流霞餐片片會有鹿門期

程芳朝江上望九華

秋江風急亂帆催九子晴峯望裏開翠擁芙蓉千尺
擎天清鐘磬上方來遙思幽徑通雲際欲探靈巖隔
水隈攀陟有緣期異日蹲鴟須共老僧煨

郭世純登九華

側聞神窟宅九峯芙蓉矗奇秀抗華荆結根在幽獨

陟彼青雲梯靈跡堆金菜飛錫鶴已去玉劒芒如削
楚蜀送風濤歛宣巨地軸稅駕聞妙香間房蠶脾簇
偃蓋拂雲根哀湍界道曲氣候變朝昏緬邈殊衆壑
顧已枉繫維乘興歎塵觸安得解絡纓雲臥託幽谷

宋犖江上望九華山

我行訪蓮峯鼓柁凌江湍蕭辰懷勝賞敲枕未能安
須臾共舟子指顧天際看龍從羣岫出秀色良可餐
嵐九殊縹緲頓令江空寒雖未窮靈境已發中心歡
如同所思友一旦相盤桓悵望空即過舍擢步回灘
亭午獨延竚願假高飛翰

毛奇齡望九華

溜水下江關輕帆天際還望中雲欲滿知是九華山
曹貞吉將至九華

天地忽慘悽夕陽淡明滅一峯兩峯晴一峯兩峯雪
快風吹雪去了了辨山容九十九峯頂亂落青芙蓉
王仲儒九華道中吟

久行午煙生空翠益可喜衣衫嵐氣中人家水聲裏
許承家舟行望九華

極目難爲狀虛空變態分半霄沈截霓絕頂出疑雲
花是天河落香綠廣漠聞江流寥廓湧靜對亦何云

趙承烈九華晚眺

晚自陵陽道垂鞭入九華竹深寒夕照峯隙漏明霞
樹杪聲聲磬巖邊處處花自慙勞役客暫息梵王家
梅庚九華山遊歸歌以紀勝

蓮花千仞開古鄣芙蓉九朶搖青陽名山兩地常相
望天風吹我同翱翔前年笑就容成宿塵垢一洗殊
砂湯從此濁體生羽翰便欲振衣凌八荒茲遊奇絕
得意外誰歟從者素與張九十九峯森拱峙一峯高
寔金地藏珠宮玉鬘禮仙蛻中天晡藹流光架紫
古繡識番錦經函龍藏生天香何年隻履經東渡黑
子一點新羅航偶拾危級歷霄嶸喜無雪霰蒙青蒼
一髮江流界南紀終古神州接混茫建安詞人氣堂
堂空山攝祭羅酒漿魏祠何緣占初地隴西之李餘
姚王文章道德本一致千秋巖堪垂精銘天臺引領
隔天半東崖雲構何輝煌騰身安坐惜片石向來林
壑空蒼涼左撫匡廬右黃海九子峯頭此勝場

江桓九華紀遊

古人論九華奇秀無倫擬吾從江上來風便一日耳
晴舫開篷戶某某峯堪指茲爲探奇秀反厭風颿駛
岡嶺崇且複寧以疲吾趾問渡已千迴只此一溪水

地勢不夷尺天漏無停晷波瀾頭上生雲霧脚下起
不復辨人寰荒荒白濛裏雨折高士巾泥穿先生履
踉蹌到僧舍嚙將闌闌比又復雨三日坐臥皆井底
兀坐繙山志深歎良有以鄙哉道學徒開堂講書旨
入室操我矛嘒嘒說儒理理障豈能除俗霧應如此
無怪蓮花峯盡入公超市長笑問山靈面目終何似
問誰錫嘉名云是謫仙李茲名豈易致定是晴堪喜
待我若如斯山終名九子

宗觀登九華山

西洪峪口朝霞紫層臺蓮花靦面起一橋一嶺終一

溪浮盡嶺橫出江水山形狡獪學人獸變怪百狀無
因倚千疊萬疊鬱詰屈噴薄忽放爭流矢寺門稻熟
穉程紅洞口泉趨磑旬駛咄哉真宰闢鴻濛九龍化
石神丁徒延袤周迴內外峯除却支山二百里仙靈
窟宅寄青冥高蹤脫略遺糠粃閱梁唐宋亦片時龍
臥豹藏那細數長江直瀉海門東勢凌姑宛去誰砥
突排天仗阨當關俯壓蛟蜃界南紀即此功輔造化
多匡廬衡霍肩應比結根不得要路津有似荒陬沈
奇士巢許掉頭避陶唐九華晦迹江之涘但遇眼高
四海人用蘇端明語古今一笑真知己吁嗟乎山有靈兮

山洗耳莫傲秦封與漢時

九華山

江上經行望未酬溪迴谷轉洞門幽高林雞鬪三更
日清響龍音六月秋佛子行高沙是飯石田開熟稻
香樓住山僧老無由到襍被應期寂寞遊

峯頭換目轉徘徊平野人耕麥壟開有佛西來惟地
藏引人江上是天台山凌姑宛攢千笏海繞蓬萊瀉
一杯石激泉衝飛瀑布臨深聽作下方雷

喻成龍九華

華東華西山水佳吾將遺身棲紫霞受籙步虛朝玉
闕祕要駐顏餐胡麻金樽瑤琴響幽壑古澗清泉流
落花須知遼海還丹客愁向人間問藏華

州府志卷第十

池州府志卷第十一

中憲大夫知江南池州府事加六級襄平馬世永編纂

山川志六 青陽九華山中

本朝康熙四十二年

上特遣使進香九華

上暨

皇太子共賜白金三百兩

康熙四十二年正月

上閱視河工遂

允江浙督撫臣民之請

池州府志卷十
省方而南歷沛

恩澤二月下浣回

鑾至江寧府時將屆

上五十聖誕督臣阿山撫臣喻成龍暨臣父兵部左侍郎臣會恩隨

駕江南同奏池州青陽縣九華山爲地藏王菩薩道場靈感昭應各建祝釐之醮隨奉

俞旨遣包衣昂邦赫奕內侍李環太僕寺少卿格爾芬進香山上

上暨

皇太子共賜白金三百兩爲供時臣開京辦差

行在即奉

命爲前導并

特賜御書以行自二月二十八日從江寧馳至青陽計三日抵山半使臣齋宿於甘露菴次早爲三月朔日僧衆披袈裟備法樂迎

旨至化城寺使臣陳香供告虔畢周覽琳宮法藏及化城與肉身寶殿兩處醮壇備極嚴敬是日天日開明羣峯獻秀香花繚繞古佛居歆於此覘聖壽之無疆卜生民之有慶而小臣開京以末微外

池州府志卷十一
吏與承

盛典俾獲趨蹌將事於下榮幸又何似邪使臣竣事
即從池州取道北旋復

命臣開京送至安慶回爰紀次

恩命歲月於左云

江南池州府通判臣胡開京恭紀

康熙四十四年三月

上允撫臣劉光美請

特賜御書九華聖境額撫臣製匾懸化城寺仍藏

御書真本於藏經樓

洪惟我

皇上函蓋寰區綏奠川岳凡名山顯位載在祀典與
仙靈佛蹟列諸圖經者俱蒙

賜額以垂無窮惟臣轄池州青陽縣九華山爲地藏
王菩薩道場與五臺峨眉普陀相峙前歲蒙

上遣使進香甚加嚴禮而未邀

宸翰似不足與諸大名山絜隆天壤茲康熙四十四
年春恭遇我

皇上以河工告成指授善後方略

親臨閱視并

巡吳會旋

駐江寧臣光美隨從

行宮敬以茲山顏額上請

御題蒙

上親灑九華聖境四大字以

賜臣光美當即叩頭祇領伏見

奎章輝煥

寶墨淋漓大則擘窠勁猶抉石勢涵飛動體極迴環
意在筆先神與天合

大聖人之能事至矣盡矣而臣光美顧名思義即佛

顏山以梵竺之真源括雲巒之勝槩益見我

皇上修德凝道作君作師立極陳常以

聖美聖非偶然也於是敬齋

員本珍奔上方仍鈎摹其副製為匾額懸諸庭楮俾
作鎮東南永永無極庶幾為茲山志不世之遇云

巡撫江南安徽等處都察院右副都御史臣劉光美恭跋

竊惟名山大川為一方之保障

天章聖藻乃不世之遭逢合近遠以咸驚非尋常所
習見池州青陽縣九華山連蜷九十九峯蓮花簪秀
周圍一百餘里祇樹生香嶺發神光共煙雲而布護

龕留佛骨遣龍象以護持每間膜拜於羣生未覩褒
題於

萬乘茲者恭遇我

皇上以天人師立帝王極闡兩間之祕奧德藝兼綜
徹三教之源流精誠共貫乃於

省方之暇

駐蹕之辰

特允撫臣請爲

御書九華聖境四大字以顏茲山猗與盛哉不
旃檀之耀而且增峻極之輝矣臣世永忝守是

臣齋到

宸翰懸之殿楹幸獲趨事下位伏見

筆墨飛騰

光華發越藏稜點畫之內蘊蓄圖書運思結構之先
包籠儀象故體全覆載不偏不頗格尚均平至中至
正非僅鸞翔鳳翥徵流動之形虎臥龍跳峴堅凝之
質而已也由是山靈呵護奎壁用以爲昭

國寶傳貽林壑因而增勝又何羨乎登封嵩少侈金
泥玉簡之文告禪云亭備東鯈西驪之物也哉于是
不揣僉鄙敬跋

琳琅曷勝慶幸之至

江南池州府知府臣馬世永恭跋

九華之爲江左名山久矣自唐開佛寺明賜藏經未云極盛也我

皇上加禮岳瀆并海內大山之著靈蹟稱鉅觀者以茲山爲地藏道場疊加

恩命康熙四十二年三月已

遣重臣齋香上供爲從來所未有之盛今康熙四十

四年三月

大駕南巡旋

駐江寧府又

特允撫臣請

御書九華聖境一額以

賜臣僦忝竊佐郡時又署青陽縣事恭遇

渥典隨撫臣懸額化城伏見

宸藻

天章紉燬日星以呈其光采河岳以著其精思即尺幅四珠真希世至寶以之永鎮茲山昭垂萬古豈不極盛歟小臣固陋喜遂觀瞻敬誌榮遇于勿替云

江南池州府同知臣王佃恭跋

青陽九華山西扼匡廬東綰建業連屬宣歙作屏池
陽誠江左第一山也若以域中淨土言之則與蜀之
峨眉代之五臺南海之普陀共爲四大名山猗與偉
矣康熙四十二年春

上特遣大臣進香以白金爲供備極優異越二年乙
酉

上尋南服還駐江寧

行在又

特允撫臣請爲

御書九華聖境匾額以

賜撫臣敬捧

大章高懸佛宇以彰慈教則龍象增華以寵山靈則
芙蓉絢采臣開京於時効趨走之役仰見

雲漢爲章

奎文有耀其體則畫沙而印泥也其法則鈎銀而截
鐵也其勢則抉石而奔泉也其姿則偃波而垂露也
洵非

大聖人以神爲謀與天合撰不能爲此茲山得至寶
以垂無窮自可與天壤間喬嶽爭衡不獨爲江南表
異矣小臣之有事茲土者適逢

盛典不更重爲慶幸哉

江南池州府通判臣胡開京恭跋

謹按輿地志九華推江左雄勝而內典列之四大名山古地藏化身遺蛻於此歷著靈應我

皇上特允撫臣請以九華聖境顏之誠以地藏爲慈氏聖者褒題自

天真

異數矣及伏觀

御筆端嚴莊重而結構自然神韻流暢匪僅書家稱聖雖極之義畫文爰何以異哉臣容山城下吏祇對

宸章深幸撫臣之獲請於

上而

上遂以榮寵茲山也不揣鄙敬爲之跋

江南池州府青陽縣知縣臣張容敬跋

我

皇上崇禮名區褒揚靈蹟江南九華山僻在一隅賜有題額誠

盛典也臣弘基草茅賤士從未仰見

宸章茲值撫臣捧額至山咫尺瞻對祇覺琳琅煥采金薤流輝備八法以無前超六書而獨絕惟有歡欣

池州府志卷之八
八
鼓舞不自知其目之何以眩神之何以移矣茲山有靈尚其敬承之無斁

青陽縣儒學教諭臣趙弘基恭跋

伏覩

御題九華聖境匾額

光華四被

氣象中涵其筆法起聖入神洵度越于昔帝王飛白諸書萬萬矣臣維楨備職儒林歡忭瞻仰實此生所未覩之寶也敬跋數字以志榮幸

青陽縣儒學訓導臣朱維楨恭跋

康熙四十八年二月

遣使進香九華

賜白金一百兩

我

皇上御極之四十八年四海乂安萬姓和樂

恩澤覃布

懷柔百神凡宇內名山大川罔不崇其廟貌時其禋祀璇題金榜照耀

奎文而池州封內九華山傑立江表巋然鉅觀旣拔地而倚天歷鍾靈而著異爰字

帝睠豐沛

聖慈始自康熙四十二年二月
特遣大臣進香化城寺

賜有白金四十四年三月又

特允撫臣奏請爲

御書九華聖境四大字以

賜撫臣鎔金製匾懸之寺楹固已萬古爲昭矣茲康
熙四十八年正月內

上分遣內府諸臣加禮諸山岳以九華爲四大名山
之一

特遣內務府廣儲司員外郎烏爾胡齊銀百兩進香
作供甚

盛典也先是臣世永偕通判臣開京知縣臣容恭建
祝

聖道場於化城寺撫臣先期蒞壇以待

上命二月十四日使臣馳至山半齋宿於橋菴十五
日質明僧衆法樂前導使臣齋

御香至寺虔告宣示

上諭撫臣劉光美率臣世永臣開京臣鈞臣容暨住
持僧衆人等叩頭祇聽伏見我

皇上竹宮矢願協應神祇香案孚誠効靈流峙即九華之屢

命覘羣祀之悉從由是慶篤九天祥徵

萬壽綿延祿祚以永作中外山川之主不勝舞蹈歡欣而自分末微叨承守土獲覩茲山疊被

寵命誠畢生未有之遇也爰為紀述歲月於左云

江南池州府知府臣馬世永恭跋